
COMUNICÂT STAMPE

CERTIFICAZION LINGUISTICHE, AL RIVE IL "PATENTIN" ANCJE PAL FURLAN

Udin, ai 7 di Avost 2013 - Vie pe ultime sentade dal Consei di aministrazion de ARLeF e je stade fate buine ancje la propueste che e fisse la modalitât e i requisîts par otignî la certificazion de cognossince de lenghe furlane.

E je une norme che si spietave pardabon di tant timp e che e met il Friûl in linie cu la esperience plurienâl, par esempli, de Provincie autonome di Bolzan, indulà che ogni an plui di 18 mil candidâts a domandin di fâ i esams par otignî la certificazion in mert ae lôr competence linguistiche tai variis nivei, daûr dal Cuadri comun european di riferiment pes lenghis.

Il regolament al darà cussì atuazion a ce che al proviôt l'articul 7 de leç regionâl 29/2007 pe tutele dal furlan, metint su cjarte lis modalitâts che a coventin ae Region par inmaneâ il sisteme di certificazion par mieç de ARLeF.

Cualsisei che al vedi plui di sedis agns e al vedi voie di "tamesâ" la sô competence linguistiche tal doprâ la lenghe al podarà presentâsi in mût spontani ai esams che a vignaran inmaneâts cun periodicitât dai ents abilitâts ae certificazion. Tai prins doi agns de jentrade in vigôr dal regolament lis ativitâts di certificazion a saran esercitadis dome de ARLeF.

A saran cuatri i certificâts di competence de lenghe furlane, articolâts in nivel A (corispondent al nivel A2 dal Cuadri european) B (corispondent al nivel B1), C1 e C2 (coincidents cui omolics C1 e C2 europeans). Par ogni nivel e vignarà bandide almancul une prove ad an.

Pe valutazion de comprension orâl, di chê scrite ricetive e di chê scrite ative, e vignarà cjapade in considerazion la lenghe comune e la grafie uficiâl. Invezit, pe valutazion orâl e sarâ pussibile la espression in cualsisedi varietât dal furlan. A judicâ i candidâts e sarâ une comission di esam formade di trê personis (di nivel C2) selezionadis e formadis de ARLeF.

Par fâ in mût che i candidâts si puedin preparâ aes provis dai esams, la Agenzie e publicarâ - ancje on line - esemplis di provis tai svariâts nivei, la bibliografie comentade dai tescj e i struments pal aprendiment de lenghe e par superâ i esams.

Elisabetta Pozzetto

[ARLeF – Agenzie Regjonâl pe Lenghe Furlane](#)

0039 0432 555724 mob 0039 335 8002058